

Submission date: 01.09.2025 Accepted date: 14/09/2025 Published date: 01/03/2026

**Status Kesahtarafan Anak Kelahiran Prematang Sebagai
Wali Nikah Menurut Perspektif Perundangan Semasa
(*The Status of a Premature Birth Child as a Wali Nikah
According to the Current Legal Perspective*)**

**Mustaqim Roslan, M.*
Nur Athirah, A.
Universiti Sultan Azlan Shah**

***Corresponding Author: muhd.mustaqim@usas.edu.my**

Abstrak

Wali merupakan individu yang berkuasa dalam mengurus dan mengatur pernikahan seseorang perempuan yang berada di bawah jagaannya. Wali yang dilantik perlu memenuhi syarat-syarat sah sebagai wali agar tidak memberikan kesan kepada pembubaran perkahwinan. Kajian ini bertujuan untuk menganalisis status kesahtarafan anak kelahiran pramatang sebagai wali nikah menurut perundangan semasa. Metodologi kajian ini ialah interpretif dengan pendekatan kajian kes sebagai strategi kajian. Reka bentuk kualitatif telah diadaptasikan dengan gabungan kaedah analisis dokumen dan temu bual separa berstruktur melibatkan tiga orang hakim mahkamah syariah. Setelah data tersebut diperolehi, kaedah analisis kandungan dokumen digunakan sekali lagi dalam proses menganalisis data yang hasilnya dikategorikan mengikut kaedah tematik. Dapatan menunjukkan anak kelahiran pramatang ialah anak yang sah menurut syarak. Namun, anak tersebut tetap digelar sebagai ATST sekiranya tidak mendapat pengesaharafan nasab di mahkamah. Walaupun begitu, anak kelahiran pramatang boleh menjadi wali nikah sekiranya menepati tiga syarat utama iaitu, melakukan pengesahan kelahiran pramatang, melakukan pengesaharafan nasab di mahkamah dan mematuhi syarat sebagai wali nikah seperti kelahiran normal. Kajian lanjutan diperlukan

untuk meneliti kesan pembubaran perkahwinan sekiranya terdapat pasangan yang tidak mematuhi ketiga-tiga syarat tersebut.

Kata Kunci: Anak pramatang, anak tak sah taraf, pembubaran perkahwinan, perundangan, wali.

Abstract

A guardian is a person authorized to oversee and arrange a woman's marriage under their care. The appointed guardian must meet legal requirements to ensure the marriage's validity. This study aims to examine the status of a child born prematurely as a wali of marriage under current laws. The methodology used is interpretive, employing a case study approach as the research strategy. A qualitative design was adopted, combining document analysis and semi-structured interviews with three Sharia court judges. After collecting the documents and interview data, content analysis was applied to examine the data, categorizing the results thematically. The findings indicate that a premature child is considered a valid child according to Sharia law. However, the child is still referred to as ATST if they do not receive a nasab certificate in court. A child born prematurely can serve as a wali of marriage if three main conditions are met: confirming the premature birth, establishing nasab equality in court, and meeting the conditions of a wali of marriage similar to those for a normal birth. Further research is needed to explore the effects of marriage dissolution if couples do not fulfill all three conditions.

Keywords: Premature child, illegitimate child, dissolution of marriage, legal guardian.

Pendahuluan

Islam mensyariatkan perkahwinan sebagai satu jalan keluar daripada perkara maksiat dan menjadi panduan bagi memenuhi fitrah manusia yang ingin hidup berpasangan (Solihah Mansor, 2023). Untuk memastikan pasangan itu mencapai matlamat tersebut, sesebuah perkahwinan perlu dibina berdasarkan rukun-rukun dan syarat-syarat yang telah ditetapkan oleh syarak. Rukun yang dimaksudkan ialah pasangan lelaki dan perempuan, dua orang saksi yang adil, *sighah* dan wali (Wan Abdul Fattah Wan Ismail et al., 2018). Isu utama perbincangan kajian ini

membincangkan perihal wali. Wali merupakan seseorang yang mempunyai hak untuk melakukan akad perkahwinan kepada orang di bawah peliharaannya. Dalam konteks ini, seorang wali hendaklah memenuhi ketetapan syariah bagi memastikan sesuatu pernikahan itu sah di sisi hukum syarak. Perkara tersebut berdasarkan sebuah hadis yang bermaksud:

“Tidak sah nikah melainkan dengan wali” (Riwayat Abu Daud, No Hadis:2085).

Selain itu, perihal wali juga dinyatakan dalam Enakmen Undang-Undang Keluarga Islam. Sebagai contoh, menurut Undang-Undang Keluarga Islam Negeri Selangor (2003), perkahwinan hendaklah mengikut peruntukan enakmen serta akadnya mengikut hukum syarak dan akad tersebut dilakukan di hadapan pendaftar. Justeru, perwalian mengikut ketetapan syarak dan undang-undang perlu mencakupi semua aspek bagi memastikan pernikahan yang dibina tidak mendatangkan implikasi negatif terhadap pasangan yang ingin mendirikan rumah tangga.

Namun begitu, terdapat juga dalam kes perkahwinan pada hari ini yang didakwa menggunakan wali yang tidak sah seperti mana dalam kes dua orang adik-beradik bernombor 10023-042-xxxx- 2022 dan 10023-042-xxxx-2022 di Mahkamah Rendah Syariah Klang (MRSK), Selangor. Perkahwinan kedua-dua pasangan tersebut terpaksa dibubarkan apabila wali yang telah digunakan iaitu abang mereka telah diklasifikasikan sebagai anak tidak sah taraf (ATST). Menurut sistem perundangan Islam di Malaysia, pembubaran perkahwinan bukan hanya melalui talak sahaja tetapi terdapat beberapa sebab lain yang membolehkan mahkamah melakukan pembubaran sesebuah perkahwinan. Contohnya, perkahwinan seorang wanita dengan menggunakan wali ATST (Wan Abdul Fattah Wan Ismail et al., 2018). Berdasarkan kes tersebut, ketidaksahtarakan wali hanya dihitung dari tempoh kelahirannya yang tidak mencukupi enam bulan dua *lahzah* dengan tarikh pernikahan ibu bapa mereka, sedangkan abangnya dilahirkan secara pramatang. Menurut hukum syarak, wali yang dilahirkan secara pramatang itu sah dan layak menjadi wali kerana mempunyai hubungan pertalian darah yang sah dengan adik-beradiknya serta melalui pernikahan yang sah (Zulkifli Mohamad al-Bakri, 2023). Namun, bagaimanakah pula dengan status kesahatarakan wali anak pramatang menurut undang-undang?

Sehubungan dengan itu, artikel ini dihasilkan bertujuan untuk mengenal pasti status kesahatarafan anak kelahiran pramatang sebagai wali nikah mengikut perundangan semasa. Hasil kajian ini membuktikan pengesahan wali amat penting kepada pasangan yang ingin berkahwin supaya jika kes yang akan datang berlaku, tidak semudahnya untuk memfaraqkan atau membubarkan sesebuah perkahwinan tersebut. Pengkaji meyakini bahawa setiap perundangan yang ditetapkan pasti meliputi pelbagai aspek. Namun, sejauh manakah status kesahatarafan wali anak pramatang sebagai wali nikah memerlukan kepada penelitian dalam artikel ini. Secara khususnya, artikel ini akan menjawab satu persoalan iaitu, apakah status kesahatarafan wali kelahiran anak pramatang sebagai wali nikah mengikut undang-undang?

Sorotan Kajian

Beberapa kajian lepas telah dikenal pasti sebagai asas sokongan terhadap pembangunan kerangka pemikiran dalam kajian ini, khususnya yang berkaitan dengan skop wali bagi anak tak sah taraf (ATST) yang dilahirkan pramatang. Sebagai contoh, kajian oleh Nurul Hasna' Hazni (2023) yang bertajuk "*Penasaban Anak Kelahiran Kurang Enam Bulan: Kajian Terhadap Keperluan Pelaksanaannya Berasaskan Jawatankuasa Fatwa Negeri Perlis*" meneliti aspek penasaban anak yang dilahirkan kurang daripada enam bulan tempoh perkahwinan. Hasil kajiannya menunjukkan bahawa keputusan fatwa oleh Jabatan Fatwa Negeri Perlis adalah berpandukan kepada hujah syarak dan pertimbangan masalah. Meskipun kajian tersebut memberi fokus kepada aspek penasaban, ia tetap berkait secara tidak langsung dengan isu yang dikaji dalam kajian ini, iaitu dari sudut tempoh kelahiran anak. Namun begitu, perbezaan utama terletak pada fokus; kajian ini lebih tertumpu kepada status ATST sebagai wali dalam urusan pernikahan, berbanding persoalan penasaban semata-mata.

Dalam konteks perundangan pula, kajian oleh Siti Aishah Borhanuddin et al. (2023) yang bertajuk "*Kesalahan Berkahwin Tanpa Kebenaran bagi Orang Islam di Malaysia: Tinjauan Berdasarkan Perspektif Syarak dan Undang-Undang*" memberikan gambaran umum mengenai permasalahan perkahwinan tanpa kebenaran yang turut melibatkan isu perwalian. Kajian ini membincangkan kesalahan dari perspektif syarak dan undang-undang, terutamanya dalam kes pernikahan yang tidak mendapat kebenaran pihak berkuasa. Walau bagaimanapun, kajian tersebut tidak secara spesifik

menyentuh kedudukan wali nikah dalam kalangan anak pramatang, sekali gus memperlihatkan jurang yang ingin diisi oleh kajian ini dari sudut status wali ATST menurut undang-undang.

Sementara itu, kajian oleh Lenny Nadriana dan Elti Yunani (2023) melalui tajuk *“Implementasi Perlindungan Hukum Terhadap Hilangnya Hak Istri dan Anak Akibat Pernikahan Sirri”* pula menelusuri aspek perlindungan undang-undang terhadap isteri dan anak hasil perkahwinan sirri. Kajian ini menekankan pentingnya permohonan nikah *ithbat*, pelaksanaan perkahwinan semula, serta sesi musyawarah keluarga sebagai langkah perlindungan. Walaupun fokus kajian ini lebih kepada mekanisme perlindungan hak dalam konteks perkahwinan tidak rasmi, elemen perbincangan berkenaan keabsahan pernikahan dan implikasi terhadap hak anak turut menunjukkan kaitan tidak langsung dengan isu perwalian yang dibincangkan dalam kajian ini. Secara keseluruhannya, ketiga-tiga kajian ini membekalkan asas literatur yang signifikan, namun belum secara tuntas meneliti kedudukan anak tak sah taraf pramatang sebagai wali nikah dari perspektif syarak dan perundangan di Malaysia. Justeru, kajian ini dilaksanakan untuk mengisi kekosongan tersebut dengan memberikan tumpuan terhadap aspek yang kurang diterokai dalam sorotan kajian lepas.

Metodologi Kajian

Metodologi kajian, objektif dan matlamat kajian boleh tercapai melalui penggunaan cara, kaedah serta pendekatan. Selain itu, metodologi kajian juga merujuk kepada tiga perkara asas iaitu reka bentuk kajian, kaedah pengumpulan data dan kaedah analisis data (Mustaqim Roslan, 2023). Pendekatan atau reka bentuk kajian boleh digunakan oleh pengkaji sesuai dengan epistemologi Islam dan objektif yang ditetapkan, sama ada menggunakan pendekatan kuantitatif, kualitatif atau gabungan kualitatif dan kuantitatif. Oleh yang demikian, kajian ini mengadaptasikan falsafah interpretif iaitu pencarian penjelasan mengenai peristiwa-peristiwa sosial atau budaya yang didasari oleh perspektif persekitaran yang sedang dikaji (Muslim, 2016). Kajian kes dipilih sebagai strategi kajian ini kerana ia membolehkan penerokaan mendalam terhadap status kesahtrafan anak pramatang sebagai wali nikah.

Reka bentuk kualitatif telah digunakan dalam kajian ini dengan gabungan teknik analisis kandungan dokumen dan temu bual soalan separa

berstruktur. Menurut Ritchie & Lewis (2003), kaedah temu bual separa berstruktur digunakan bertujuan untuk mendapatkan maklumat yang diperlukan secara bersemuka dengan informan bagi mengenal pasti isu dan masalah kajian. Kaedah ini juga sangat sesuai digunakan dalam kajian ini agar beberapa soalan tambahan dapat diajukan kepada informan. Dalam konteks kajian ini, temu bual dijalankan terhadap dua orang informan iaitu melibatkan Hakim syarie yang bertugas di Mahkamah Syariah Ipoh sebagai Informan Satu (In1), dan Hakim syarie yang bertugas di Mahkamah Syariah Taiping sebagai Informan Dua (In2). Pemilihan dua orang responden ini dipilih berdasarkan persampelan bertujuan (*purposive sampling*) yang dilihat berkemampuan untuk mencapai objektif kajian. *Purposive sampling* melibatkan pemilihan individu yang sesuai dengan kriteria yang berkaitan untuk memberikan maklumat yang relevan dan signifikan (Darusalam & Hussin, 2016).

Data kajian kemudiannya dianalisis menggunakan pendekatan analisis tematik. Proses analisis tematik melibatkan beberapa fasa yang pertama adalah penyaringan data, di mana transkripsi rakaman audio-video diproses untuk diubah kepada bentuk verbatim, iaitu ayat demi ayat atau frasa demi frasa. Seterusnya, transkrip diindeks dengan memberi kod tertentu kepada setiap informan berdasarkan transkrip mereka. Kod-kod ini membantu dalam penjanaan semula data asal serta memudahkan rujukan silang semasa penulisan dan menyiapkan laporan (Darussalam et al, 2016). Menurut Mustaqim Roslan (2023), terdapat lima langkah dalam mengatur analisis tematik iaitu dimulai dengan menyalin semula transkrip temu bual secara verbatim, membuat agihan soalan kajian, membuat pengkategorian awal, mencari tema dan membuat pengekodan.

Konsep Wali Nikah dan Anak Pra Matang

1. Konsep Wali Menurut Perspektif Islam

Wali ialah individu yang boleh menikahkan pengantin perempuan (Kamus Dewan, 2017). Wali juga berkait rapat dengan kuasa bapa atau datuk untuk menikahkan anak atau cucu mereka. Perkataan wali dalam bahasa Arab digunakan dengan rangkai kata "*alwilayah fi al-nikah aw al-ziwaj*". Perkataan "*al-wilayah*" merupakan kata dasar daripada "*wa-li-ya*"

bermaksud menolong dan menguasai (Noraini Mohamad, Siti Zaleha Ibrahim, Hasliza Talib & Norsaadah Din, 2021). Dari sudut istilah fuqaha membawa maksud suatu kebolehan yang ditentukan oleh agama dalam melakukan akad ke atas diri dan harta orang lain di bawah tanggungjawabnya daripada segi hukum syarak (al-Zuhailiy, 1977). Menurut Zaleha Kamaruddin dan Raihanah Abdullah (2002), harta orang lain di bawah tanggungjawabnya mencakupi anak kecil yang belum baligh, orang kurang upaya, orang gila dan kanak-kanak yang sudah baligh dan mampu membuat pilihan. Wali juga mempunyai tiga kategori iaitu wali mujbir, wali ikhtiar dan wali hakim. Wali mujbir dan wali ikhtiar ialah wali nasab kepada wanita yang diwalikan daripadanya manakala wali hakim ialah pihak yang tidak mempunyai wali atau tidak mempunyai wali sah dari sudut hukum syarak. Contohnya, wali tinggal terlalu jauh, wali akrab yang tidak dapat dikesan, wali enggan serta anak tidak sah taraf.

Wali merupakan salah satu rukun dalam perkahwinan dan kedudukannya berdasarkan dalil yang jelas. Antara firman Allah SWT dalam surah al-Baqarah ayat 232:

‘Dan apabila kamu menceraikan isteri-isteri (kamu), lalu habis masa idah mereka, maka janganlah kamu (wahai wali-wali nikah) menahan mereka daripada berkahwin...’ (al-Baqarah, 2:232)

Menurut Mustafa al-Khin et al. (2000), sekiranya wali tidak mempunyai autoriti atau tiada kepentingan dalam sesebuah perkahwinan, maka Allah SWT tidak menegur para wali supaya tidak menghalang perkahwinan seperti dinyatakan dalam ayat tersebut. Kenyataan ini sekali gus menjadikan *istidlal* al-Syafie’ dalam menetapkan wali sebagai rukun pernikahan yang sah. Justeru, perkahwinan tanpa wali yang dilakukan dengan niat sengaja ialah menjadi tidak sah di sisi syarak disebabkan wali merupakan penjaga terhadap wanita (Zulfaqar Mamat, 2024). Allah SWT meletakkan tanggungjawab kepada lelaki lebih daripada perempuan. Hal tersebut membuktikan nilai kepentingan wali terhadap wanita berlandaskan hukum syarak. Oleh itu, isu berkaitan wali merupakan satu isu besar dalam bab perkahwinan.

Dari sudut perundangan, Akta Undang-Undang Keluarga Islam 1984 Wilayah Persekutuan (Akta 303) tidak menyatakan secara jelas berkaitan definisi wali. Walaupun begitu, maksud wali boleh difahami melalui

Seksyen 2 yang mentafsirkan wali mujbir sebagai bapa. Manakala wali raja membawa erti wali yang ditauliahkan oleh Yang di-Pertuan Agong dalam hal wilayah yang melibatkan Wilayah Persekutuan, Melaka, Pulau Pinang, Sabah dan Sarawak atau wali yang ditauliahkan oleh Raja dalam hal sesuatu negeri lain untuk mengahwinkan perempuan tidak mempunyai wali daripada nasab. Berdasarkan keterangan tersebut, wali mujbir dan wali raja merupakan seseorang yang memiliki autoriti untuk mengahwinkan perempuan. Enakmen negeri-negeri lain juga menggunakan perkataan yang sama dan mempunyai perbezaan sedikit dari sudut perkataan iaitu wali raja kepada wali hakim. Oleh itu, wali merupakan satu kepentingan dalam sesebuah perkahwinan dalam hukum syarak dan undang-undang.

2. Konsep Anak Pramatang

Kajian ini juga membincangkan tentang maksud kefahaman bagi anak pramatang. Perkataan “anak pramatang” ialah gabungan daripada dua perkataan iaitu “anak” dan “pramatang” yang mana kedua-duanya membawa maksud yang berbeza. Menurut Kamus Dewan (2017), anak dalam erti kata bahasa Melayu ialah baka yang diturunkan oleh ibu dan bapa. Selain itu, perkataan anak membawa maksud keturunan oleh hasil kedua-dua baka ibu dan bapa. Anak juga diberi maksud orang yang termasuk dalam sesuatu keluarga. Menurut Zulkifli Mohamad al-Bakri (2015), anak dalam al-Quran membawa perkataan *ibn* jamak kepada *abna* yang membawa erti sesuatu kelahiran, manakala istilah pramatang diberi maksud suatu proses kelahiran yang tidak mencukupi bulan (Kamus Dewan, 2017). Menurut Fatimah Desa (2006), pramatang ialah bayi yang lahir sebelum mencapai tiga puluh tujuh minggu kehamilan dan berat badan kurang daripada dua ribu lima ratus gram (2500gm). Jangkaan kelahiran yang berlaku tiga minggu sebelum tarikh jangkaan kelahiran bayi tersebut merupakan bayi pramatang (Myhealth Kementerian Kesihatan Malaysia, 2024). Pramatang mempunyai empat kategori. Pertama, pramatang lewat ialah bayi lahir di antara tiga puluh empat hingga tiga puluh enam minggu. Kedua, pramatang sederhana lewat iaitu bayi lahir di antara tiga puluh dua hingga tiga puluh empat minggu. Ketiga, pramatang awal iaitu bayi lahir kurang daripada tiga puluh dua minggu.

Akhir sekali, pramatang sangat awal iaitu bayi yang lahir sebelum berusia dua puluh lapan minggu (Ashikin Md Desa, 2022).

Oleh itu, dapatlah dirumuskan bahawa anak pramatang ialah suatu proses kelahiran di mana keadaan anak itu sendiri yang tidak mencapai atau mencukupi kadar tempoh kelahiran seperti kelahiran yang normal. Menurut Zulkifli Mohamad al-Bakri (2023), anak yang tidak cukup bulan itu boleh dijadikan wali nikah selagimana tidak ada yang menghalanginya seperti status anak zina. Perkara tersebut bertepatan dengan hadis Rasulullah SAW yang bermaksud:

“Anak itu untuk hampan (isteri) dan bagi pezina itu adalah batu (tidak mendapat hak nasab)” (Riwayat Bukhārī, No. Hadis: 6818).


Hal ini menunjukkan bahawa syarak tidak menafikan kesahtarafan anak pramatang sebagai wali nikah memandangkan kelahiran anak tersebut ialah sah dari jalur pernikahan yang sempurna dan bukan daripada hasil perzinaan. Namun begitu, memandangkan tempoh kelahirannya tidak mencukupi enam bulan dua *lahzah* dari tempoh pernikahan ibu bapanya, status anak pramatang telah diklasifikasikan sebagai ATST menurut perundangan seperti dalam kes di MRSK sehingga mengakibatkan anak tersebut terhalang untuk menjadi wali nikah. Perbezaan status anak pramatang sebagai wali nikah ini menjadi persoalan utama pengkaji tentang bagaimanakah perbezaan status ini boleh terjadi, sedangkan perundangan di mahkamah syariah tersebut berasaskan hukum syarak? Oleh yang demikian, analisis status kesahtarafan anak pramatang sebagai wali nikah menurut perspektif undang-undang dibincangkan secara lebih tuntas dalam subtopik seterusnya.

Analisis Status Kesahtarafan Kelahiran Anak Prematang sebagai Wali Nikah menurut Perspektif Undang-Undang

Secara dasarnya status anak pramatang sebagai wali nikah menurut perspektif undang-undang adalah tidak sah. Hal ini disebabkan tempoh pernikahan ibu bapa dengan tempoh kelahiran anak itu tidak mencukupi enam bulan dua *lahzah* (detik) iaitu satu *lahzah* untuk *wati'* (persetubuhan) dan satu *lahzah* lagi untuk bersalin

(al-Hafiz Ishak, 2023). Menurut In1, berdasarkan hukum syarak anak yang dilahirkan dalam keadaan pramatang melalui pernikahan yang sah itu dikira anak sah taraf (komunikasi peribadi, April 4, 2024). Namun begitu, bagi mengelakkan berlakunya pernikahan syubhah jika melibatkan anak pramatang itu, maka beberapa perkara perlu dititikberatkan supaya tidak menimbulkan keraguan terhadap perkahwinan tersebut. Dapatan menunjukkan bahawa anak kelahiran pramatang ialah anak yang sah menurut syarak, tetapi anak tersebut tetap digelar sebagai ATST sekiranya tidak mendapat pengesahatarafan nasab di mahkamah. Walaupun begitu, anak kelahiran pramatang boleh menjadi wali nikah dengan mematuhi tiga syarat utama iaitu, melakukan pengesahan kelahiran pramatang, melakukan pengesahatarafan nasab di mahkamah dan mematuhi syarat sebagai wali nikah seperti kelahiran normal. Rajah 1 berikut menunjukkan syarat-syarat pengesahatarafan wali nikah dalam kalangan anak pra matang.

Rajah 1: Dapatan khusus status kesahatarafan anak pramatang sebagai wali nikah



1. Melakukan Pengesahan Kelahiran Anak Prematang

Menurut Kamus Dewan (2017), sah membawa maksud sesuatu yang mempunyai kelulusan dari sudut undang-undang dan diakui oleh sesebuah organisasi yang ditetapkan. Menurut Muhammad Akramin (2017), sah membawa maksud sesuatu yang memenuhi rukun-rukun dan syarat-syaratnya yang membawa kepada penerimaan syarak pada hak hukum iaitu setiap perlakuan manusia sama ada perkara ibadah atau perkara muamalat yang dianggap sah atau dihukumkan sebagai sah menurut syarak

sekiranya ia memenuhi semua rukun dan syaratnya sebagaimana yang dituntut. Anak pula didefinisikan sebagai baka yang diturunkan oleh ibu bapa dan keturunan kedua-duanya di dalam institusi kekeluargaan (Kamus Dewan, 2017) manakala istilah anak pramatang membawa maksud sebagai kelahiran bayi yang diterangkan sebagai suatu proses kelahiran yang berlaku tiga minggu sebelum tarikh jangkaan bayi dilahirkan. Selain itu, istilah yang mudah difahami ialah bayi yang lahir tidak cukup bulan. Pengesahan anak pramatang perlu dititikberatkan dan tidak boleh dianggap remeh kerana memberi kesan kepada bayi tersebut apabila sudah mencapai umur dewasa kelak terutama dalam hal yang berkaitan dengan wali nikah.

Selain itu, tidak menjadi satu isu jika anak pramatang ingin menjadi wali dalam sebuah perkahwinan. Ia patut dititikberatkan dalam membuat kesahan anak pramatang di mahkamah bagi mengelakkan implikasi yang akan berlaku pada masa akan datang. Menurut In1, hal ini dibuktikan dengan kes seorang anak yang berumur dalam lingkungan dua tahun yang membuat pengesahan anak pramatang di Mahkamah Syariah Ipoh kerana diklasifikasi ATST dan tidak boleh didaftarkan nama biologi bapanya di Jabatan Pendaftaran Negara (JPN) (komunikasi peribadi, April 4, 2024). Kebiasaannya, anak pramatang akan mengalami masalah kesihatan kerana perkembangannya tidak seperti anak normal yang lain. Ia perlu membuat pemantauan daripada pihak hospital kerana bayi pramatang perlu dihangatkan di dalam mesin inkubator bayi (MyHealth Kementerian Kesihatan Malaysia, 2024). Seterusnya, anak pramatang dilahirkan awal sebelum tempoh kelahirannya disebabkan beberapa faktor kesihatan daripada ibunya atau bayi itu sendiri. Maka, perkara ini kemungkinan boleh menimbulkan masalah pada masa akan datang jika bayi itu semakin meningkat usianya seperti masalah kedengaran, penglihatan dan sebagainya. Walau bagaimanapun, terdapat juga beberapa kemungkinan lain anak kelahiran pramatang tidak mempunyai masalah kesihatan pada usia dewasa. Justeru menurut In1, untuk mengelakkan perkara ini terjadi pada masa akan datang khususnya apabila anak yang lahir dalam kelahiran pramatang itu sihat serta menjadi wali nikah, menjadi satu keperluan agar kesahan anak pramatang dijalankan di mahkamah (komunikasi peribadi, April 4, 2024).

Jelaslah bahawa, proses kesahan anak pramatang perlu dititikberatkan bagi mengelakkan berlaku implikasi pada masa akan datang. Lebih-lebih lagi, jika melibatkan individu yang dilahirkan secara pramatang serta pihak

tertentu diklasifikasi sebagai ATST. Oleh sebab itu, ia perlu mengemukakan bukti iaitu dengan mendapatkan pengesahan daripada doktor yang mengendalikan bayi pramatang tersebut. Menurut In2, rekod kesihatan ibu iaitu buku yang merekodkan kesihatan ibu dan bayi sepanjang tempoh kehamilan wajib disertakan bersama-sama semasa membuat pengesahan anak pramatang di mahkamah (komunikasi peribadi, April 24, 2024). Walaupun begitu, mana-mana pihak yang ingin membuat kesahan anak pramatang di mahkamah perlu mengikut prosedur iaitu pihak itu sendiri perlu memohon permohonan tentang kesahan anak pramatang di mahkamah bagi memudahkan urusan seterusnya. Perkara tersebut amat penting bagi setiap individu kerana melibatkan wali bagi sesebuah perkahwinan. Menurut In2, jika kesahan anak pramatang ini tidak dibuat, ia akan menyebabkan pernikahan itu tidak sah kerana menggunakan wali yang tidak sah walaupun daripada segi syarak dikira sah (komunikasi peribadi, April 24, 2024). Namun begitu, dari sudut perundangan anak pramatang tidak dikira sah dengan akad pernikahan ibu bapanya. Oleh itu, kesahan anak pramatang perlu dilakukan di mahkamah bagi membuktikan bahawa ia anak sah taraf dan boleh menjadi wali nikah.

2. Melakukan Pengesahtarafan Nasab Di Mahkamah

Nasab dalam kamus bahasa Melayu memberi makna pertalian keluarga atau dipanggil keturunan. Nasab keturunan ini terutama daripada sebelah bapa (Kamus Dewan, 2017). Perkataan nasab diambil daripada bahasa Arab iaitu *al-nasb* membawa maksud keturunan. Berdasarkan istilah, nasab membawa maksud keturunan daripada pernikahan yang sah atau memiliki hubungan darah sesama keluarga seperti bapa, ibu dan abang (Yufi Cantika, 2017). Menurut Ibnu ‘Atiyya (2011), pengertian nasab ialah manusia yang berkumpul dengan orang lain dalam hubungan kebapaan atau keibuan, sama ada hubungan rapat atau hubungan yang jauh. Selain itu, pengertian nasab membawa maksud sandaran yang cukup kuat sehingga mampu menjalinkan hubungan kekeluargaan sesuai dengan kesatuan darah atau pertimbangan bahawa seseorang itu sebahagian daripada yang lain. Contohnya, apabila ada seorang anak yang menjadi sebahagian daripada bapa dan seorang bapa adalah sebahagian daripada

datuknya. Oleh itu, individu yang mempunyai keturunan yang sama ialah individu yang mempunyai darah yang sama dengan anak, ayah dan datuk.

Secara umumnya di Malaysia, prosedur pendaftaran kelahiran adalah di bawah bidang kuasa JPN. Perkara ini diperuntukkan di bawah Akta Pendaftaran Kelahiran dan Kematian 1957. Kewujudan akta tersebut secara langsung memberi kuasa kepada JPN untuk membuat Peraturan dan Kaedah Pendaftaran Kelahiran yang patut dipatuhi oleh semua individu yang berurusan dengan pihak JPN. Pengesahan nasab merupakan perkara penting untuk mengetahui status kesahtarafan seseorang itu dan proses tersebut perlu dilakukan di mahkamah. Mahkamah Tinggi Syariah merupakan mahkamah yang mempunyai bidang kuasa untuk mendengar sebarang kes mengenai ATST (Zulkifli Hasan et, al., 2013). Oleh itu, kes yang diklasifikasi sebagai ATST perlu dibuat di Mahkamah Tinggi Syariah negeri seperti yang diperuntukkan dalam Enakmen Mahkamah Syariah negeri-negeri. Pemohon ATST boleh membuat permohonan sendiri di Mahkamah Tinggi Syariah negeri-negeri. Menurut In2, beberapa jenis kes yang melibatkan permohonan pengesahatarafan ATST di Mahkamah Tinggi Syariah seperti permohonan pelantikan wali hakim, pihak JPN menolak untuk menasabkan ATST kepada bapa biologi dan permohonan mengesahkan sabitan nasab (komunikasi peribadi, April 24, 2024). Perkara yang melibatkan permohonan mengesahkan sabitan nasab ini kebiasaannya ingin memastikan status beliau sama ada perlu kepada pelantikan wali bagi pernikahan.

Walau bagaimanapun, permohonan mengenai pengesahan berkaitan pensabitan nasab perlu dilakukan kerana terdapat suatu kes yang berlaku di mana seorang pemohon itu tidak mempunyai masalah nasab dengan bapa biologinya asbab pemohon itu telah dinasabkan dengan bapa biologinya seperti di dalam kad pengenalan. Namun begitu, status pemohon tersebut diragui oleh pihak berkuasa bahawa pemohon tersebut didapati ATST. Berdasarkan kes tersebut, pemohon akan memohon kepada mahkamah untuk pengesahan statusnya sama ada ia ATST atau tidak secara tidak terpaksa. Menurut Enakmen Tatacara Mal Mahkamah Syariah Negeri Selangor 2003, prosedur berkaitan dengan perkara yang dinyatakan dalam jadual Kedua haruslah dimulakan melalui permohonan (Enakmen Undang-Undang Keluarga Islam Negeri Selangor, 2003). Selain itu, menurut In1 mahkamah membenarkan permohonan pengesahatarafan anak jika mendapati keraguan terhadap pihak yang

diklasifikasi sebagai ATST bagi memastikan statusnya sah atau tidak, walaupun individu itu dalam keadaan pramatang (komunikasi peribadi, April 4, 2024). Berdasarkan kes di Mahkamah Syariah Ipoh, pemohon membuat permohonan pengesahan nasab anak disebabkan anak itu dalam keadaan pramatang kerana JPN menolak untuk menasabkan anak tersebut kepada bapa biologinya.

Selain itu, terdapat juga kes yang melibatkan anak yang lahir kurang enam bulan dari tarikh perkahwinan iaitu kes Zafrin Zulhilmi bin Pauzi vs Noor Aini binti Nasron Kes No: 11300-006-0033-2012 di Mahkamah Tinggi Syariah Kuala Terengganu yang diputuskan pada 7 Ogos 2012. Pemohon iaitu Zafrin Zulhilmi bin Pauzi membuat permohonan supaya mahkamah membuat sabitan bahawa anak perempuan iaitu Nur Damia Aqilla binti Abdullah adalah anak sah taraf mengikut hukum syarak bagi pasangan pemohon dan Noor Aini binti Nasron. Namun begitu, apabila dilihat kepada sijil kelahiran, anak tersebut dilahirkan pada 3 September 2010. Pasangan dinikahkan pada 16 April 2010. Isteri pemohon tidak membantah permohonan suaminya serta turut menyokong bahawa anak perempuan tersebut disabitkan sebagai anak sah taraf. Mahkamah telah membuat keputusan bahawa anak perempuan mereka iaitu Nur Damia Aqilla binti Abdullah perlu dinasabkan kepada Zafirin Zulhilmi bin Pauzi. Mahkamah tersebut beranggapan bahawa ATST boleh dinasabkan kepada bapanya walaupun anak tersebut dilahirkan dalam keadaan kurang tempoh enam bulan tarikh akad nikah ibu bapanya (Zulkifli Hassan et al., 2013). Oleh itu, mahkamah menerima mana-mana pihak untuk membuat permohonan pengesahan nasab untuk mengetahui status kesahtrafannya.

Jelaslah bahawa, wali yang diklasifikasi sebagai ATST walaupun dalam keadaan pramatang perlu membuat permohonan pengesahan nasab terlebih dahulu supaya tidak timbul permasalahan pada masa akan datang. Oleh sebab itu, pihak pejabat agama kemungkinan terlepas pandang tentang permohonan menjadi wali sesuatu akad pernikahan. Namun begitu, apabila pihak pejabat agama mendapati bahawa anak tersebut tidak boleh menjadi wali pernikahan disebabkan oleh tempoh kelahirannya tidak mencukupi enam bulan dua *lahzah*, maka, wali itu boleh melampirkan pembuktian kepada pihak pejabat agama tersebut bahawasanya anak tersebut ialah anak sah taraf dan terdapat surat perintah daripada mahkamah. Menurut In1, pihak pejabat agama tidak boleh menafikan

perkara tersebut serta anak itu sah menjadi wali terhadap sesuatu pernikahan (komunikasi peribadi, April 4, 2024).

3. Mematuhi Syarat Sebagai Wali Nikah Seperti Kelahiran Normal

Menurut Kamus Dewan (2017) syarat membawa maksud suatu permintaan ataupun tuntutan yang mesti dipatuhi dan dipenuhi. Syarat adalah segala perkara yang mengakibatkan sesuatu menjadi disebabkan ketiadaannya. Syarat juga diterjemahkan sebagai segala sesuatu sekiranya tiada akan mengharukan sesuatu menjadi tidak ada, namun tidak mempunyai hubungan dengan akibat dan kesan. Seterusnya, wali menurut Kamus Dewan (2017) ialah golongan lelaki iaitu bapa, abang, datuk, bapa saudara dan sepupu lelaki yang lain yang boleh menikahkan pengantin perempuan. Menurut Pejabat Mufti Wilayah Persekutuan (2024), nikah membawa maksud suatu akad yang menghalalkan hubungan ataupun *istimta'* (bersetubuh atau berseronok-seronok) di antara suami isteri dengan cara yang dibenarkan oleh syarak. Secara keseluruhannya, syarat wali nikah menjadi suatu maksud atau makna iaitu tuntutan yang diperlukan atau prosedur yang perlu dipatuhi oleh wali iaitu lelaki yang akan menikahkan pengantin perempuan dalam akad perkahwinan. Antara syarat bagi seseorang untuk menjadi wali nikah yang sah ialah beragama Islam, baligh, berakal iaitu tidak gila, berjantina lelaki, adil dan merdeka.

Sekiranya, wali tersebut menepati kesemua syarat-syarat tersebut maka pernikahan tersebut diiktiraf sebagai perkahwinan yang sah menurut hukum syarak. Namun, timbul persoalan adakah anak pramatang dibolehkan untuk menjadi wali nikah? Menurut In1, syarat untuk menjadi wali nikah bagi anak pramatang dan anak yang lahir secara normal tidak mempunyai perbezaan sama sekali kerana menurut hukum syarak sekiranya anak pramatang tersebut lahir daripada perkahwinan pasangan suami isteri yang sah tidak menjejaskan sebarang syarat wali nikah tersebut (komunikasi peribadi, April 4, 2024). Walaupun hukum perundangan menyusuli hukum syarak bagi syarat wali nikah anak pramatang, tetapi perundangan tidak mengesahkan kesahan anak pramatang tersebut kerana anak tersebut lahir kurang dari tempoh yang sepatutnya iaitu enam bulan dua *lahzah*. Menurut In2, tiada perbezaan bagi

syarat wali nikah anak pramatang dan anak yang lahir secara normal selagi mana tidak terdapat sebarang permasalahan daripada segi nasab dan juga pernikahan ibu bapa anak pramatang tersebut (komunikasi peribadi, April 24, 2024). Hal ini demikian kerana perkahwinan yang sah tidak menjejaskan apa-apa hukum dan larangan kepada seseorang dalam urusan syarie seperti menjadi wali, dinasabkan kepada nama ayah tersebut dan juga dalam pengurusan harta pusaka.

Walau bagaimanapun, sekiranya undang-undang tidak mengesahkan anak pramatang tersebut menjadi wali nikah yang sah atas dasar tempoh kelahiran yang tidak mencukupi, anak tersebut tetap boleh menjadi wali nikah yang sah sekiranya ia mencukupi syarat yang sepatutnya. Menurut In1, tiada masalah jika hukum perundangan tidak mengesahkan anak pramatang tersebut kerana anak pramatang tersebut boleh membuat permohonan bagi pengesahan nasab dan juga membuat permohonan di mahkamah bagi mendapatkan surat kebenaran ataupun surat pengesahan yang mengatakan bahawa individu yang bergelar anak pramatang tersebut ialah nasab yang sah dan lahir daripada perkahwinan yang sah (komunikasi peribadi, April 4, 2024). Jika anak tersebut disahkan sebagai anak yang lahir daripada perkahwinan yang sah, maka sudah tidak menjadi halangan untuk anak pramatang tersebut menjadi wali nikah yang sah. Di samping itu, anak pramatang tersebut perlu mempunyai bukti yang kukuh daripada pengesahan mahkamah mengatakan bahawa dia boleh menjadi wali nikah walaupun undang-undang tidak mengiktiraf perkara tersebut pada awalnya. Menurut Jabatan Mufti Sarawak (2024), wali dalam suatu akad pernikahan mempunyai kedudukan yang sangat penting dan boleh menjadi penentu sama ada pernikahan tersebut sah ataupun sebaliknya.

Menurut In2, tidak terdapat sebarang perbezaan bagi syarat wali nikah anak pramatang dengan anak yang lahir secara normal kerana syarat wali berbalik kepada asal hukum syarak sahaja (komunikasi peribadi, April 24, 2024). Tiada sebarang perubahan ataupun halangan bagi kedua-dua kategori anak tersebut bagi melayakkan mereka menjadi wali nikah. Oleh itu, hukum perundangan hanya tidak mengesahkan anak pramatang sahaja daripada segi tempoh kelahiran yang tidak mencapai enam bulan dua *lahzah*. Namun, anak pramatang yang mendapat pengesahan nasab serta surat pengesahan dari mahkamah secara langsung masih melayakkan anak pramatang tersebut menjadi wali nikah sama seperti anak yang lahir secara normal.

Implikasi Wali Anak Pramatang Diklasifikasi Anak Tidak Sah Taraf

Perkataan “pernikahan syubhah” ialah gabungan perkataan yang berbeza. Perkataan pernikahan ditakrifkan sebagai perbuatan atau hal bernikah (Kamus Dewan, 2017). Perkataan syubhah pula ditakrifkan sebagai kesamaran iaitu perkara tidak jelas hukumnya antara halal dan haram (Kamus Dewan, 2017). Selain itu, “persetubuhan syubhah” membawa maksud persetubuhan yang dilakukan berdasarkan anggapan sah akad nikah tetapi akad itu sebenarnya tidak sah (Enakmen Undang-Undang Keluarga Islam, 2003). Di samping itu, perkataan faraq membawa maksud berbeza, berlainan dan terpisah (Kamus Dewan, 2017). Berdasarkan istilah, faraq membawa maksud kepada pembubaran perkahwinan dan tidak melalui talak (Jabatan Kemajuan Islam Malaysia, 2024).

Oleh sebab itu, faraq perkahwinan disebabkan oleh sesuatu perkara tertentu dan pihak berkuasa tidak boleh dihukum secara terus untuk memfaraqkan sesebuah pasangan itu. Antara sebab berlakunya faraq perkahwinan ialah perkahwinan sesama mahram seperti mengahwini adik beradik, perkahwinan dengan lima orang perempuan dalam satu masa atau akad tidak dibolehkan dan seorang wali yang tidak diiktiraf perwalian oleh syarak ke atas perkahwinan seorang perempuan itu (Wan Abdul Fattah Wan Ismail et al., 2018). Perkara tersebut perlu dibawa ke mahkamah untuk menjalani prosedur tertentu. Menurut undang-undang, sesuatu perkahwinan tidak sah melainkan jika syarat yang diperlukan semuanya cukup dan mengikut hukum syarak untuk menjadikannya sah. Namun demikian, jika sesuatu perkahwinan itu didapati *fasid* atau kekeliruan wali malah tidak menepati rukun nikah, maka perkahwinan itu boleh dimohon untuk dibubarkan dan pasangan tersebut perlu difaraqkan (Muhammad Ridzuan, 2014). Permohonan untuk memfaraqkan sesuatu perkahwinan yang tidak sah boleh dibuat oleh pasangan tersebut iaitu suami atau isteri, ibu bapa atau penjaga. Selain itu, pihak pejabat agama juga boleh membuat permohonan untuk memfaraqkan sesuatu perkahwinan jika menyedari kesilapan atau kekhilafan yang berlaku. Sebelum melakukan pemfaraqkan ia perlu kepada permohonan dan perlu disertakan beberapa perkara khususnya di mahkamah syariah iaitu permohonan, affidavit sokongan, salinan kad pengenalan, sijil nikah dan surat pengesahan perkahwinan.

Pembubaran perkahwinan secara faraq yang berlaku di Malaysia kebiasaannya disebabkan oleh kekeliruan para wali atau saksi. Selain itu,

kes faraq juga disebabkan perkahwinan tanpa wali atau perkahwinan luar negara yang lebih dikenali sebagai perkahwinan sindiket. Antara contoh kes yang berlaku di Malaysia iaitu di Terengganu melibatkan kes Hashim bin Mohamad lawan Syed Yusof bin Syed Mohamad dan Suryani binti Hashim. Kes tersebut berlaku kerana bapa kepada wanita itu sendiri memohon dari mahkamah tersebut untuk memfaraqkan perkahwinan anak perempuannya yang telah dijalankan di Thailand. Hakim telah membicarakan kes tersebut dalam beberapa perkara iaitu pertama mensabitkan akad nikah perkahwinan antara lelaki dan perempuan sebagai akad nikah bagi perkahwinan yang *fasid* kerana wali yang digunakan dalam perkahwinan ialah wali am dan bukannya seorang wali hakim. Kedua, pengiktirafan dari mahkamah tidak dapat diberikan terhadap pasangan itu. Ketiga, mahkamah mensabitkan persetubuhan yang berlaku sebelum ini sebagai persetubuhan syubhah. Oleh itu, pernikahan yang berlaku itu ialah *fasid*, maka mahkamah mengarahkan pasangan suami isteri itu perlu difaraqkan. Contoh kedua, kes yang berlaku di Johor sepasang suami isteri iaitu Muhammad Nazirul Azman Nasaruddin dan Zanariah Abdullah telah diarahkan berpisah setelah pejabat agama mengesahkan pernikahan mereka itu tidak sah. Hal ini demikian kerana, pernikahan pasangan tersebut menggunakan wali hakim sedangkan ia masih mempunyai wali iaitu adik lelakinya yang berusia 19 tahun. Permohonan faraq tersebut dilakukan oleh pejabat agama itu sendiri dan diterima oleh mahkamah serta memutuskan pasangan itu difaraq dan bernikah pada bila-bila masa sahaja (Muhammad Ridzuan, 2014).

Seterusnya, kes yang berlaku di Selangor ialah sebuah kes yang jarang-jarang berlaku di Malaysia. Berdasarkan kes tersebut dua pasangan iaitu Ahmad Zairi bin Coursesenu dan Nur Shuai'dah binti Mohd Rosni, Muhammad Azelly Aidil bin Othman dan Nur Najjwa binti Mohd Rosni. Dalam kes tersebut, perkahwinan mereka perlu difaraqkan kerana wali yang digunakan oleh abang kedua pasangan itu sendiri didapati ATST kerana tempoh kelahirannya tidak mencukupi enam bulan dua *lahzah* dari tempoh pernikahan ibu bapanya. Oleh itu, mahkamah mensabitkan perkahwinan tersebut perlu difaraqkan dan meluluskan tuntutan plaintif tersebut berdasarkan Seksyen 61(3)(b)(i) Enakmen Pentadbiran Agama Islam (Negeri Selangor). Menurut In1, perkahwinan yang mempunyai keraguan boleh menjadi tidak sah dan perlu memohon faraq ke atas perkahwinan tersebut (komunikasi peribadi, April 4, 2024). Permohonan faraq itu boleh dibuat melalui pihak pejabat agama itu sendiri, pasangan

yang didakwa atau wali yang telah diklasifikasikan ATST. Oleh itu, pihak mahkamah meluluskan pemfaraan tersebut dan isteri kepada kedua-dua pasangan itu perlu menjalani idah tiga kali suci.

Jelaslah bahawa status kelahiran anak pramatang sebagai wali nikah menurut perundangan semasa menjadi sah atas pernikahan tersebut dengan syarat melalui tiga perkara tersebut iaitu melakukan pengesahan kelahiran anak pramatang, melakukan pengesahatarafan nasab di mahkamah dan mematuhi syarat sebagai wali nikah seperti kelahiran normal. Namun begitu, jika tidak memenuhi ketiga-tiga syarat tersebut, perkara ini akan menyebabkan implikasi terhadap sesebuah pasangan iaitu berlakunya pembubaran perkahwinan kerana anak itu klasifikasi sebagai ATST. Oleh sebab itu, perkara tersebut akan menimbulkan keraguan bagi pihak pejabat agama terhadap wali tersebut kerana tempoh kelahirannya tidak mencukupi enam bulan dua *lahzah* dari tempoh pernikahan ibu bapanya. Justeru, perkara tersebut amat penting dan perlu dititikberatkan bagi pasangan yang ingin berkahwin kerana tidak ingin perkara sebegini berlaku pada masa akan datang.

Kesimpulan

Kesimpulannya, wali ialah individu yang berkuasa untuk mengatur pernikahan seseorang wanita yang berada di bawah jagaannya. Wali juga merupakan salah satu rukun dalam menyempurnakan sesebuah perkahwinan itu. Jika berlaku kekurangan rukun wali tersebut, maka perkahwinannya menjadi tidak sah. Wali amat penting dari sudut hukum syarak kerana ia ialah satu perintah daripada Allah SWT dalam menyempurnakan pernikahan. Namun begitu, undang-undang Malaysia menekankan perihal wali anak pramatang sebagai ATST dengan mengambil kira tempoh kelahirannya dengan tempoh pernikahan ibu bapanya. Hasil dapatan menunjukkan bahawa anak kelahiran pramatang ialah anak yang sah menurut syarak, tetapi anak tersebut tetap digelar sebagai ATST sekiranya tidak mendapat pengesahatarafan nasab di mahkamah. Walaupun begitu, anak kelahiran pramatang boleh menjadi wali nikah dengan mematuhi tiga syarat utama iaitu, melakukan pengesahan kelahiran pramatang, melakukan pengesahatarafan nasab di mahkamah dan mematuhi syarat sebagai wali nikah seperti kelahiran normal. Artikel ini mencadangkan supaya pihak berkuasa khususnya pihak

pejabat agama lebih berhati-hati ketika menyemak dokumen wali agar wali yang digunakan ketika akad perkahwinan adalah benar-benar sah menurut syarak. Hal ini kerana wali merupakan rukun yang terpenting dalam sesebuah pernikahan. Perkara ini secara langsung memberi implikasi yang negatif kepada pasangan jika wali itu dikategorikan sebagai ATST. Sehubungan dengan itu, kajian lanjutan diperlukan untuk meneliti kesan pembubaran perkahwinan sekiranya terdapat pasangan yang tidak mematuhi ketiga-tiga syarat yang telah dibincangkan dalam artikel ini.

Rujukan

- Al-Bugha, M. (2000). *Al-Fiqh al-Manhaji Ala Mazhab al-Imam al-Syafie*. Damsyiq: Dar al-Qalam.
- Al-Bakri, Z. M. (2015). Anak Ihsanilah. Retrieved from Pejabat Mufti Wilayah Persekutuan: <https://muftiwp.gov.my/en/artikel/bayan-linnas/1810-anak-ihsanilah>
- Al-Bakri, Z. M. (2023, Oktober). Lahir Tidak Cukup Bulan Adakah Boleh Menjadi Wali? Retrieved from maktabahalbakri.com: <https://maktabahalbakri.com/3483-lahir-tidak-cukup-bulan-adakah-boleh-menjadi-wali/>
- Al-Zuhayliy, Wahbah. (1977). *al-Fiqh al-Islamy wa Adillatuh*. Beirut: Dar al-Fikr.
- Darusalam, G., & Husin, S. (2016). *Metodologi Penyelidikan Dalam Pendidikan*. Universiti Malaya.
- Desa, A. M. (2022). Awas! Tekanan Antara 12 Punca Utama Bayi Lahir Tak Cukup Bulan. Retrieved from <https://hellodoktor.com/keibubapaan/bayi/bayi-pramatang/kelahiran-bayi-pramatang//>
- Desa, F. (2006). *Pengetahuan Ibu Bapa Dalam Penjagaan Bayi Prematang Di Hospital Universiti Sains Malaysia*. Retrieved from Universiti Sains Malaysia: Malaysia:

<http://eprints.usm.my/59437/1/FATIMAH%20BINTI%20DESA%20-%20eprints.pdf>

Enakmen Undang-Undang Keluarga Islam. (2003). Retrieved from <https://www.mais.gov.my/wp-content/uploads/2020/10/ENAKMEN-UNDANG-UNDANG-KELUARGA-ISLAM-NEGERI-SELANGOR-2003.pdf>

Faraq. (2017, Februari 27). Retrieved from Jabatan Kemajuan Islam Malaysia: <https://www.islam.gov.my/ms/>

Ibnu Athiya. (2011). *Al- Jami' al-Muharrar al-Wajiz fi Tafsir al-Kitab al- 'Aziz*. Beirut: Dar al- Kutub.

Ishak, A.-H. (2023). Kaedah Pengiraan Enam Bulan Untuk Penasaban Anak. Retrieved from Mufti Wilayah Persekutuan: <https://muftiwp.gov.my/en/artikel/irsyad-fatwa/irsyad-fatwa-umum-cat/5758-irsyad-al-fatwa-siri-ke-802-kaedah-pengiraan-enam-bulan-untuk-penasaban-anak>

Jabatan Mufti Sarawak. *Irsyad: Maksud Wali*. Kuching: Sarawak. Retrieved 1 May 2024 from https://muftinegeri.sarawak.gov.my/web/subpage/irsyad_details/&rid=UDlxK01ZzJqVXpRMmpNazZlaUVRQT09Ojpl3NN54mXK3mZR6TQAftWt

Kamus Dewan Bahasa. (2012). 4th ed. Dewan Bahasa dan Pustaka, Kuala Lumpur.

Kamus Dewan Bahasa. (2017). 4th ed. Dewan Bahasa dan Pustaka, Kuala Lumpur.

M., M. R., & N., N. F. (2025). Kesan Positif Selepas Perceraian: Analisis Kualitatif Kesedaran Hak dalam Kalangan Isteri yang Telah Bercerai/ Positive Impact After Divorce: A Qualitative Analysis of Rights Awareness Among Divorced Wives. *UMRAN – Journal of Islamic and Civilizational Studies*, 12(1), 61-74. <https://doi.org/10.11113/umran2025.12n1.725>

- Mamat, Z. (2024). Pentingnya Wali Dalam Kehidupan Seorang Muslim. Retrieved from Universiti Sains Islam Malaysia: <https://www.usim.edu.my/ms/berita/in-our-words-ms/pentingnya-wali-dalam-kehidupan-seorang-muslimah/>
- Mansor, S. (2023). Perceraian Bagi Perkahwinan Yang Berusia Kurang Dari Tempoh Satu Tahun Di Mahkamah Rendah Syariah Petaling. *Journal Of Shariah Law Research* .
- Muslim, M. S. (2016). Varian-Varian Paradigma, Pendekatan, Metode, dan Jenis Penelitian dalam Ilmu Komunikasi. *Wahana. Universitas Pakuan, Indonesia*. Vol. 1 No. 10.
- Muhammad Akramin. (2017). Sah dan batal menurut ulama Usul Fiqh. *Universiti Pendidikan Sultan Idris*.
- Mustaqim Roslan, M & Luhamul Ashfia, S. B. C. Pendekatan Syarikat Ar Rasyidin Consultancy (ARC) dalam menangani Isu Aset Beku di Malaysia. (2025). *International Journal of World Civilizations and Philosophical Studies*, 3(3). <https://ejournal.usm.my/ijwcps/article/view/5015>
- MyHealth Kementerian Kesihatan Malaysia. (2024). Retrieved from Myhealth: <http://www.myhealth.gov.my/bayi-pramatang/>
- Noraini, M., Siti Zaleha, I, Hasliza, T & Norsaadah, D. (2021). Konsep Wali Kepada Anak Yatim: Kajian Terhadap Kefahaman Dan Peranan Ahli Masyarakat. *Sultan Alauddin Sulaiman Shah*, vol 8 Bil 2.
- Nurul Hasna' Hazni. (2023). Penasaban Anak Kelahiran Kurang Enam Bulan: Kajian Terhadap Keperluan Pelaksanaannya Berasaskan Fatwa Jawatankuasa Fatwa Negeri Perlis. *Universiti Utara Malaysia*.
- Pejabat Wilayah Persekutuan. (2024). Retrieved from muftiwp <https://muftiwp.gov.my/ms/>

- Ridzuan, M. (2014). Faraq Dalam Perkahwinan. Retrieved from <https://www.slideshare.net/slideshow/faraq-dalam-perkahwinan/41946614>
- Ritchie, J., & Lewis, J. (2003). Qualitative research practice-A guide for social science students and researchers. Sage Publications Ltd.
- Roslan, M. M. (2025). Masalah Tekanan Emosi Terhadap Penamaan Nasab Anak Tak Sah Taraf kepada Abdullah: Analisis Fatwa Kebangsaan: The Problem of Emotional Pressure Regarding the Named Lineage of an Illegal Child to Abdullah: Analysis of a National Fatwa. *Al-Takamul Al-Ma'rifi*, 8(1), 10–20. Retrieved from: <https://jurnal.usas.edu.my/altakamul/index.php/altakmulfiles/article/view/317>
- Roslan , M. M., & A Aziz, M. A. (2025). Gejala Kemurungan Akibat Pembubaran Pernikahan Syubhah: Analisis Kajian Kes: [Depression Symptoms Resulting From Doubtful Marriage Dissolution: A Case Study Analysis]. *KQT EJurnal*, 5(1), 1–19. Retrieved from: <http://ejurnal.kqt.edu.my/index.php/kqt-ojs/article/view/98>
- Roslan , M. M. (2024). Metodologi Pendalilan terhadap Fatwa Pensabitan Nasab Anak Tak Sah Taraf di Malaysia: Analisis Penamaan kepada Bapa Biologi: [Argument Methodology Against Fatwa Conviction of Illegitimate Children's Lineage in Malaysia: Analysis of The Name of The Biological Father]. *KQT EJurnal*, 4(2), 1–19. Retrieved from: <http://ejurnal.kqt.edu.my/index.php/kqt-ojs/article/view/90>
- Siti Aishah Borhanuddin, Mahamatayuding Samah & Mohd Norhusairi Mat Hussin. (2023). Kesalahan Berkahwin Tanpa Kebenaran Bagi Orang Islam Di Malaysia: Tinjauan Berdasarkan Perspektif Syarak Dan Undang-Undang. *Journal Pengajian Islam*, vol 16.
- Wan Abdul Fattah Wan Ismail, Hasnizam Hashim, Syahirah Abdul Shukor & Asma Harun. (2018). Faraq Perkahwinan Bagi Pasangan Tak Sah Taraf di Negeri Sembilan . *Universiti Kebangsaan Malaysia*, vol 13.

- Yunani, L. N. (2023). Implement Perlindungan Hukum Terhadap Hilangnya Hak Istri Dan Anak Akibat Pernikahan Sirri. Universitas Sang Bumi Rawa Jurai, 27-35.
- Yufi Cantika. (2017). Nasab Adalah: Pengertian, Faktor Dan Sistemnya Dalam Ajaran Agama Islam. Retrieved from <https://www.gramedia.com/literasi/nasab/>
- Zaleha Kamaruddin & Raihanah Abdullah. (2002). Kamus Istilah Undang-Undang Keluarga Islam. Cetakan Pertama. Kuala Lumpur: Zebra Editions Sdn. Bhd.
- Zulkifli Hassan, Irwan Mohd Subri & Lukman Abdul Mutalib. (2013). Kedudukan anak tak sah taraf menurut perspektif undang-undang. Universiti Sains Islam Malaysia.